

## Bonngoe Khumamelong



### SABATHA MANTSIBOEA

#### **Bakeng sa Boithuto ba Beke Ena Bala:**

Tšen. 4:8, 11; Matt. 4:8, 9; Dan. 3:8–18; Tšen. 14:9; Tšen. 14:6, 7; Liketso 4:23–31.

#### **Teman'a Khopolo:**

“Hape, ka bona lenyeloi le leng le fofang mahareng a leholimo, le tšoere Evangeli ea ka mehla le mehla ho e bolella ba ahileng lefatšeng, le lichaba tsohle, le mefuta eohle, le lipuo tsohle, le merabe eohle; le re ka lentsoe le phahamileng: Tšabang Molimo, isang khanya ho oona, hobane nako ea ho ahloa ha oona e tile; 'me le khumamele ea entseng leholimo, le lefatše, le leoatile, le liliba tsa metsi’ ”(Tšenolo 14:6, 7).

**H**ang kamor'a Pentekonta, Bakreste ba pele ba ile ba qeta boholo ba nako ea bona thapelong. “Ba ne ba tiisetša thutong ea baapostola, le kopanong ea boena, le ho ngoatheng bohobe, le merapelong” (Liketso 2:42). Thabo e neng e tlisoa ke ho tseba hore Jesu ke Mesia, phethahatso ea boporofeta ba Testamente ea Khale, e ne e tlatsa lipelo tsa bona ka poko le teboho ho Molimo. Monyetla o mo ka kang oa ho tseba 'nete ena e makatsang. Bakreste bana ba pele ba ile ba utloa ba e-na le bohloki ba ho qeta nako ba le kopanong ea boena, boithutong, le thapelong, e le ho leboha Molimo ka tšenolelo ea Hae ka bophelo, lefu, le tsoho ea Jesu, le ka seo a se entseng maphelong a bona. Kereke ea Krete e hlalosa 'moka oa khumamelong, o theiloeng ke Molimo ho ba “ntlo ea Moea, le bopristsa bo halalelang, ho hlalisa mahlabei a Moea, a natefelang Molimo ka Jesu Krete” (1 Pet. 2:5). Teboho ho Molimo e bontšoang ka phutheho ea khumamelo e fetola lipelo le likelello tsa batho hore li tšoane le semelo sa Molimo 'me ho ba lokisetša tšebetso. Thuto ea beke ena e talimile se boleloang ke khumamelo le kamoo e bolokang bonngoe har'a balumeli ka Jesu.

*\*Ihute thuto ea beke ena ho lokisetša Sabatha sa la 15 Tšitoe.*

## Ho Khumamela 'Mopi le Molopoli oa Rona

Lipuisanong ka khumamelo, re atisa ho tšoaea lintlha tsa khumamelo, seo e se kenyelletsang le kamoo e etsoang kateng. Empa moelelo o tebileng oa khumamelo ke o fe? Ho bolela eng ho khumamela Molimo? 'Me re ho etsa hobaneng? Ho Lipesalema 29:2, Davida o re: “Busetsang ho Jehova khanya ea lebitso la hae! Khumamelang Jehova ka mekhabo e khethehileng” (Ps. 29:2). Pesaleme ena e supa tsela e nepahetseng ea ho utloisisa se boleloang ke khumamelo. Ho khumamela Jehova ke ho isa ho Eena khanya le hlompfo tse mo lokelang..

**Tšenolo 4 le 5 li hlalosa tlhomamiso ea Jesu leholimong nyolohelong ea Hae. Baahi ba leholimo ba fana ka mabaka afe a ho khumamela Molimo le Jesu, Konyana ea Molimo? Sheba Tšen. 4:8, 11; 5:9, 10, 12, 13.**

Tlhaloso ena ea khumamelo phaposing ea terone leholimong ha Jesu a tsebisoa e le Konyana ea Molimo le Mopholosi oa Lefatše e tlatsa ka tšabo le thothomelo. Khumamelo e etsahala ha tlhohle ea Molimo e mo arabela ka mantsoe a pabato le teboho ka seo a se entseng. Khumamelo ke karabelo ea motho ea nang le teboho ka popo le pholoho ea Molimo. Pheletsong ea nako, balopolloa le bona ba tla kena pabatsong 'me ba arabele poloko ea Molimo ka tsela e tšoanang. “ 'E mehola, ea babatseha, mesebetsi ea hao, Morena Molimo o matla 'ohle! Oho Morena oa lichaba, litsela tsa hao li lokile ha ka kang, ke 'nete feela! Ea sa tl' o u tšaba ke ha e le mang, Morena? Ea sa tl' o tlotlisa lebitso la hao ke mang? Hobane ea halalelang ke uena u 'notši. 'Me lichaba tsohle li tla tla, li khumame maotong a hao, kahobane likahlolo tsa hao li beiloe pepeneneng' ” (Tšen. 15:3, 4). Joale, ke karabelo ea tumelo ea rona ka lebaka la mesebetsi ea Hae e mehola: pele, ka ho bopa, le, ea bobeli, ka ho re pholosa. Khumamelong re fana ka pabato ho Molimo, hlompfo, thorisano, lerato, le kutlo eo re lumelang hore o loketsoe ke ho e amohela. Ehlile, seo re se tsebang ka Molimo, e le 'Mopi le Mopholosi oa rona, se tsoa ho seo a re senoletseng sona ka Lengolo. Ho feta moo, seo Bakreste ba se tsebang ka Molimo se ile sa senoloa ka botlalo bo fetisang bothong le bosebeletsing ba Jesu (sheba Johanne 14:8–14). Ke kahona Bakreste ba khumamelang Jesu e le Mopholosi le Molopoli, joalokaha lefu la Hae la sehlabelo le tsoho e le tsona khubu ea khumamelo. Ha Bakreste ba bokana hammoho ho khumamela, ke ka moelelo ona ona oa ho hlolloa le teboho khumamelo ea rona e lokelang ho hlaha.

**Nahana ka seo re se neiloeng ho Krete e le 'Mopi le Mopholosi oa rona, le ka seo a re lopollotseng ho sona, le ka seo a re neang sona — tsena tsohle hobane feela a ile a ikhethela ho shoa sebakeng sa rona. Ke hobaneng ha linnete tsee li lokela ho ba motheo oa khumamelo ea rona?**

## Khumamelo ea Bohata

**Bala Mattheu 4:8, 9. Teko ea boraro ea Jesu lefeelleng e bile efe?**

Ka boikhothomoso le boikakaso, Satane o ipolela e le eena 'musi oa lefatše ka tšoanelo, monga maruo 'ohle le khanya, a re hlomphe le tlotla eohle ea ba phelang ho lona e tla ho eena, joalokaha a entse lefatše. Thohako e ka kang ho Molimo, 'Mopi le Ntate oa Jesu. Satane o ile a bontša hore o tseba hantle hore na khumamelo ke eng: ho fana ka thlomphe le tlotla ho eo ka tšoanelo e leng monga maholimo le mafatše.

**Bapisa boiphihlelo ba bahlankana ba bararo ba ba-Heberu ho Daniele 3 (haholo temana ea 8–18) le matla a mehla ea bofelo a Tšenolo 13:4 le 14:9–11. Tseko e tlo ba holim'a eng nakong ea bofelo? Taba-kholo ke efe litlalehong tsee ka bobeli?**

Ho tloha ho Kaine le Abele, ho ea ho bahlankana ba bararo ba ba-Heberu Babilona, liketsahalo tsa ho qetela tse mabapi le “letšoao la sebata,” (Tšen. 16:2), Satane o leka ho thea mofuta oa borapeli ba bohata, o tlosang batho ho Molimo oa 'nete, 'me, leha e ka ba ka masene, a tobise khumamelo ho eena. Ehlile, le pele ho ho Oa, o n'a s'a ntsa batla ho ba joalo ka Molimo (Esa. 14:14). E ne e se taba ea tšohanyetso hore joalokaha bahlankana ba bararo ba ile ba tobana le tšoso ea lefu haeba feela ba sa khumamele setšoano tšo,” le matsatsing a ho qetela batho ba tšepelang ba Molimo ba tla tobana le tšoso ea lefu haeba ba sa khumamele “setšoano tšo.” Hobaneng ho ka khumameloa “setšoano tšo” sefe kapa sefe ha re bile litsoe ho khumamela Molimo oa 'nete? “Lithuto tse lokelang ho ithutoa boiphihlelong ba bacha ba ba-Heberu lehoatateng la Dura I bohlokoa. . . . “Nako ea mahlomola e kapele ho batho ba Molimo e tla hloka tumelo e ke keng ea sisinyeha. Bana ba Hae ba lokela ho bontša hore ke Eena feela ea lokeloang ke khumamelo ea bona, 'me ha ba na le mohopolo, leha e le oa bophelo ka bo-bona, oa ho nahana le hanyane feela ka ho inehela khumamelong ea bohata. Pelong e tšepelang litaelo tsa batho ba tletseng sebe ba shoang li tla hloka bohlokoa ha li bapisoa le lentsoe la Molimo oa bosafeleng. 'Nete e tla lateloa leha litholoana e ka ba ho hlaleloa chankaneng kapa ho lelekoa naheng kapa lefu.”—Ellen G. White, *Prophets and Kings*, maq. 512, 513.

**Ke litsela life tse fapaneng, le hajoale, tseo re ka bang tekong ea ho khumamela mang kapa mang kathoko ho Eo ea lokeloang ke khumamelo ea rona a le mong feela? Khumamelo ea bohata e ka ba kotsi e masene joang ho feta kamoo re ka nahanang kateng? Ke life lintho tse ling tseo re ka 'nang ra qholotseha hore re li khumamele?**

## Molaetsa oa Lenyeloi la Pele

Baleti ba Bolokang Letsatsi la Bosupa ba bona molaetsa oa manyeloi a mararo oa Tšenolo 14:6–12 e le oona o hlalosang thomo ea bona le 'moko-tabo oa molaetsa oa bona pejana feela ho ho tla ha bobeli ha Jesu (Tšen. 14:14–20). Ena ke melaetsa ea bohlokoa e lokelang ho rutoa ka “lentsoe le phahamileng” ho bohle ba ahileng lefatšeng.

**Bala Tšenolo 14:6, 7. Molaetsa oa lenyeloi la pele o bua ka eng, 'me e re'ng ka Molimo? Hobaneng ha ho buuo a ka khumamelo molaetseng oo?**

---



---



---

Molaetsa oa pele oa manyeloi a mararo o phatlalatsa molaetsa ho lefatše lohle. Hona ke phethahatso ea boporofeta ba Jesu ho Mattheu 24:14. Ho na le moelelo oa ho potlaka setšoantšong sena sa manyeloi a mararo le thomo ea ona. Molaetsa oa pele o khothaletsa batho ho talima ho Molimo hobane “ ‘nako ea ho ahloa ha oona e se e tlile’ ” (Tšen. 14:7). Ho tla ha bobeli ha Jesu ho akofisa kahlolo. “ ‘Tšabang Molimo,’ ” ho rialo lenyeloi (Tšen. 14:7). Ho bao ba sa nkeleng Molimo hloohong, molaetsa ona le pitso ea ho nka khato li tla kenya letsoalo lipelong tsa bona. Empa ho bao esaleng e le balateli ba Jesu, pitso ena e memela tšabo le hlomphe. Ba talima holimo ho Molimo 'me ba bona phethahatso ea litšepiso tsa Hae. Boikutlo bo boholo ba hlomphe ho Molimo bo ba hapa lipelo. “ ‘Me le khumamele ea entseng leholimo, le lefatše, le leoatile, le liliba tsa metsi’ ” (Tšen. 14:7). Puo ena e tšoaela ho molao oa Sabatha ntle ho tikatiko, ha e bua ka Tlholeho (sheba Exod. 20:8–11). Molimo oa Tlholeho, ea hlomamisitseng Sabatha e le sehopotso sa matla a Hae a ho bopa, ke Eena ea loketsoeng ke khumamelo le tšabo. Ho ea thahasellisa ho hlokomela hore qetellong ea nako khumamelo e tšoaoua e le taba ea mantlha ntoeng e kholo bakeng sa bolateli ba leloko labotho. Tsebiso ena ea lefatše ka bophara ke pitso ea ho khumamela 'Mopi. “Taba ea mantlha tlokotsing ea ho qetela e tla ba khumamelo. Tšenolo e ea hlakisa hore teko ha e na ba ho hana ho khumamela, empa hore na ke mang ea khumameloang. Nakong ea bofelu, lefatšeng mona ho tla be ho na le lihlopha tse peli feela tsa batho: ba tšabang le ho khumamela Molimo oa 'nete (11:1, 18; 14:7) le ba hloileng 'nete 'me bao e le barapeli ba drakone le sebata (13:4–8, 14:9–11). . . . “Haeba khumamelo ke eona taba-khoho ntoeng ea ho qetela, ha ho makatse hore Molimo o romela molaetsa oa mehla ea bofelu o khothaletsang batho ho mo nkela hloohong 'me ba mo khumamele e le 'Mopi, e leng Eena feela ea loketsoeng ke khumamelo.” —Ranko Stefanovic, *Revelation of Jesus Christ: Commentary on the Book of Revelation* (Berrien Springs, Mich.: Andrews University Press, 2002), maq. 444, 445.

# Boithuto ba Bibe le Kopano ea Boena

**Bala Liketso 2:42. Tse ling tsa lintlha tsa khumamelo ea Bakreste ba pele ke life?**

---

---

“Ba ne ba tiisetsa thutong ea baapostola, le kopanong ea boena” (Liketso 2:42). Ho tloha metsotsong ea pele-pele ea kereke, khumamelo haesale e nka sebopeho seo boithuto ba Lentsoe la Molimo leo re le neiloeng ke baapostola bo le khabung ea eona. Bakreste ba pele ba ne batšepahalla ho ithuta Mangolo ka seo a se buang ka Jesu, Mesia. Ba ne ba lula ba le kopanong ea boena ho arolelana le e mong le e mong lithohonolofatso tseo Molimo a ba fileng tsona le ho khothatsana leetong la bona la semoea le Molimo. Lentsoeng ba ne ba rafa linnete tse halalelang tse neng li fetoha motheo oa molaetsa oa bona ho lefatše.

**Litemana tse latelang li re’ng ka bohlokoa ba ho ithuta Lentsoe kopanong ea boena le balumeli ba bang?**

**2 Marena 22:8–13** \_\_\_\_\_

**Liketso 17:10, 11** \_\_\_\_\_

**2 Tim. 3:14–17** \_\_\_\_\_

“Hohle moo linnete tsa evangeli li phatlalatsang, ba lakatsang ho etsa se lokileng ba tataisetsoa ho botseng Mangolo. Haeba liketsahalang tse koalang nalane ea lefaše lena, bao ba phatlalletsoang linnete tse lekaneng ba ka latela mohlala oa ba-Berea, ba botsisisa Mangolo kamehla, ’me ba bapisa melaetsa e tlišoang ho bona le lentsoe la Molimo, kajeno ho ka be ho na le palo e ngata ea ba tšepahallang litaelo tsa molao oa Molimo, moo hajoale e leng lipalo tse fokolang.”—Ellen G. White, *The Acts of the Apostles*, leq. 232. Re sechaba se kopaneng ka lebaka la linnete tseo re li phatlalatsang, linnete tseo re li fumanang Lentsoeng la Molimo. Taba ena ke ea ’nete ka kereke ea pele, ’me e ntse e le ea ’nete le kajeno. Boithuto ba Lentsoe la Molimo bo etsa ’moko-taba oa khumamelo ea rona ho Molimo le bongoe ba rona re le batho ba biletsoeng ho phatlalatsa molaetsa oa manyeloi a mararo lefatšeng. Ha re phutheha hammoho re le lelapa ho ba le kopano ea boena le khumamelo, Mangolo a bua le rona ho tsoa ho Molimo ho tataisa maphelo a rona bakeng sa ho a lokisetsa thomo ea rona le ho tla ha bobeli ha Krete.

**U tsitsitse ka thata hakae, ho tsoa Bibeleng, ka seo re se lumelang? Ke hore, na u tsitsitse ho eona ho fihlela boemong, joaloka bahlankana ba bararo ba ba-Heberu, u ka emang u tiile ha u tobane le lefu?**

## Ho Ngoatha Bohobe le Thapelo

Ho sa natsoe liqholotso tse kereke ea pele e ileng ea tobana le tsona, e ne e tlamahane tumelong ea eona ho Jesu le 'neteng eo a ba tšepetseng eona hore ba e hase lefatšeng. Ke seo Petrose a bileng a se bitsa “'nete ea ha joale” (2 Petr. 1:12). 'Me kahona, ba tlamahane 'neteng, ba ile ba bontša bonngoe ba bona ka tsela tse 'maloa. “Ba ne ba tiisetsa . . . le ho ngoathoeng ha bohobe, le merapelong” (Liketso 2:42). Ho buoa ka ho ngoatha bohobe hona ho tlameha ho buoa ka lijo tsa setsoalle kapa lijo tsa kamehla tse neng li arolelanoa ke Balumeli. Nakong e itseng ha ho ntse ho ngoathoa bohobe, motho e mong o ne a tla etsa tlhohonolofatso e ikhethang bakeng sa lijo le lino e le sehopotso sa lefu le tsoho ea Kreste, le tebello ea ho khutla ha hae kapele. Ke ka mokhoa ona Bakreste ba pele ba neng ba behella nako ea bona ka thoko ho hopola se boleloang ke bophelo ba Kreste le bosebeletsi ba Hae, 'me ba rata ho bua ka tsona nakong ea lijo tsa setsoalle. Lijo tseo ba neng ba li arolelana li ile tsa fetoha nako ea khumamelo. “Ba ne ba tiisetsa tempeleng ka matsatsi ohle, ba le pelo e le 'ngoe; e n'e re ha ba e-etsoa tlung e 'ngoe ba ne ba kena ho e 'ngoe, ba ntse ba ngoatha bohobe, ba ne ba e-ja lijo tsa bona ka thabo le ka lipelo tse bonolo, ba boka Molimo 'me ba khahlisa sechaba kaofela. 'me Morena a 'na a eketsa kereke ka tsatsi le leng le le leng ka batho ba bolokehang.” (Liketso 2:46, 47). Haho potang hore nako ena ea setsoalle 'moho e ile ea thusa haholo hore ho be le kopano eo ba nang le eona ho Jesu.

**Ke mehlala efe eo re nang le eona bukeng ea Liketso, ea Bakreste ba pele moo ba rapelang 'moho? Ba ne ba rapella eng?**

**Liketso 1:14** \_\_\_\_\_

**Liketso 4:23–31** \_\_\_\_\_

**Liketso 12:12** \_\_\_\_\_

Kereke ea pele e ile ea natefeloa ke monyetla oa puisano e otlolohileng le Molimo 'me le kamohla ea se ke ea sitoa ho isa likopo ho Eena ha ba kopano e 'moho khumamelong. Pauluse epistoleng ea hae ea pele ho Timothea o bua ka bohlokoa ba thapelo nakong eo Bakreste ba leng 'moho (1 Tim. 2:1). Ho Ba-Efese, o boetse a toboketsa bohlokoa ba thapelo: “Le rapele ka moea kamehla, ka merapelo eohle, le falimehele teng ka tiisetso eohle, 'me le rapelle bahalaleli bohle—le 'na le nthapelle” (Ba-Ef. 6:18, 19).

**Tse ling tsa litsela tseo re ka bang le maiphihlelo a tebileng a bonngoe ka matla ke ho rapellana bakeng sa maemo a mehla le mehla? Thapelo e thusa joang ho tlamahanya kereke?**

\_\_\_\_\_

## Ho Ithuta Haholoanyane:

Bala lingoloa tsena “Thapelo,” maq. 1044–1046, le “Khumamelo,” maq. 1290, 1291, ho *The Ellen G. White Encyclopedia*. “ ‘Bohlokoa ba Sabatha e le sehopotso sa tlholeho ke hore e boloka lebaka la ‘nete la bohlokoa ba hore na hobaneng Molimo a lokeloa ke khumamelo.’—hobane ke ’Mopi, rona re libopuo tsa Hae. ‘Ka hona Sabatha e motheong oa khumamelo e halalelang, hobane e ruta ’nete ena e kholo ka tsela e hlollang, ’me ha ho eng kapa eng e etsang sena. Motheo oa ’nete oa khumamelo e halalelang, eseng feela oa e etsoang ka letsatsi la bosupa, empa khumamelo eohle, e fumanoa phapanong ea ’Mopi le libopuo tsa Hae. Ha ho mohla ’nete ena e kholo e ka felang, ’me ha e ea tlemeha ho lebaloa le ka mohla.’—J. N. Andrews, *History of the Sabbath*, khaolo ea 27. E ne e tla boloka ’nete ena likelellong tsa batho bohle, hore Molimo o hlomamisitse Sabatha Edene; ‘me ha feela ’nete ea hore ke ’Mopi oa rona e ntse e le lebaka la hore na hobaneng re tlemeha ho mo khumamela, Sabatha e tla lula e le letšoao le sehopotso. Haeba Sabatha e ne e ile ea bolokoa lefatšeng lohle, likelello le marato a batho a ka be a ile a tataisetsoa ho ’Mopi e le Eena khubu ea tlhonepho le khumamelo, ’me ha ho kamoo ho ka beng ho ile hoa e-ba le khumamelo ea litšoantšo, ho se lumele ho Molimo. Ho boloka Sabatha ke letšoao la ho tšepahalla Molimo oa ’nete, ‘Eena ea entseng maholimo, lefatše, le leoatle, le liliba tsa metsi.’ E latela hore molaetsa o laelang batho ho khumamela Molimo le ho boloka liatelo tsa Hae o tla ba biletsa ho boloka molao oa bone.”—Ellen G. White, *The Great Controversy*, maq. 437, 438.

## Lipotso tsa Puisano:

1. Kaha taba ea khumamelo ea ka Bibeleng, tlholeho, le pholoho li nyallana haholo, o nahana ho ke joang keteka Sabatha e ka bang sehlare sa Molimo khumamelong ea bohata? Ke karolo efe e bapaloang ke Sabatha boporofeteng boo ba mehlang ea bofelo ba Tšenolo 14:6, 7? Ke hobaneng ha ho buuo ka Sabatha molaetseng oa lenyeloi la pele?
2. Ha ngata re bua ka khumelo e le taba feela—ntho tseo re tlemehang ho li etsa kapa ho se li etse nakong ea khumamelo. Na seo se lekane? Hantle-ntle, khumamelo e malebana le eng? Kereke ea heno e fumana khumamelo ea ’nete joang?
3. Libakeng tse ling, khumamelo ea Bakreste ea kopanelo e ea e ntse e fela le ho nyahlatsoa, le har’a Masala. Ke sefe seo kereke ea heno e ka se etsang ho loantša boemo boo?

**Kakaretso:** Khumamelo ke kananelo ea teboho e etsoang ke molumeli oa Mokreste eo a e etsetsang Molimo bakeng sa mpho ea Hae ea pholoho. E boetse ke karolo ea bohlokoa ea maiphihlelo a bonngoe le setsoalle sa sehlopha sa Bakreste. Kantle ho thapelo le boithuto ba Bibe le taba-tabelong ea ho tseba ’nete ea Molimo bakeng sa rona, sehlopha sa rona se tla hloleha ho bona bonngoe ho Krete.